

omnium descriptionem, & *Situm Terræ Sanctæ* litteris mandavit; quod posterius opusculum Cantabrigiæ etiamnum adservari dicitur, sed editum fuit Antverpiæ, apud Nicol. Wower anno 1564.

Jerosolymitanæ urbis, Templique in ea origo & horum rursus exscidium, anno MCCCCLXXVI. à RUDOLPHO LANGIO, Canonico Monasteriensi, descripta sunt & edita Colonia, apud Cervicornum anno 1517.

BERNARDUS BREIDENBACHIUS, Decanus Moguntinus, edidit Peregrinationem Jerosolymitanam & Montis Sinai Moguntia, anno MCCCCLXXXVI.

Descriptio est Jerosolymitani Itineris anno MDXX. facti à GERARDO KUYNRETORF, quæ est edita Campis.

Exstat etiam Itinerarii Jerosolymitani & Terræ Sanctæ, inibique sacrorum locorum ac rituum descriptio BARTHOLOMÆI A SALIGNIACO, sedis Apostolicæ Protonotario; quod iter anno MDXXII. fecit. Editum est hoc opus Lugduni 1526.

Lovanii lucem vidit anno 1563. Peregrinatio, cum exacta descriptione Jerusalem, & locorum Sanctorum, auctore S. Theologiæ Doctore JOANNE PASCHA, Carmelita Mechliniensi, quam anno MDXXVII. perfecit.

*Aitsingerus* auctor est, librum enim non vidi, PETRUM APIANUM de eodem argumento opus edidisse anno MDXXXII. Celebris is fuit Mathematicus, à Carolo V. Cæsare equestri dignitate, agrisque donatus.

Memorat etiam librum JACOBI, Patriarchæ Jerosolymitani, eadem de re, editum anno MDXXXVI.

Laudatur quoque JACOBUS ZIEGLERUS, Landavus Bavarus, qui descriptionem Terræ Sanctæ, seu Palæsthinæ in publicam lucem emisit, anno eodem, aliaque Geographica conscripsit.

Anno MDXXXVII. ut habet idem *Aitsingerus*, GERARDUS MERCATOR, Geographorum sui temporis princeps, Judææ descriptionem emisit.

Civitatis Jerusalem ac Sacrorum locorum universæ Palæsthinæ delineatio ac descriptio, per HERMANNUM BORCULOO, prodiit Ultrajecti, anno MDXXXVIII.

Huic, ex eodem scriptore, succenturiandus WOLFGANGUS WEISEMBURGIUS, qui anno MDXLII. hac de re opus edidit.

Delineatio & descriptio Jerusalem & Terræ Promissionis, per BONAVENTURAM BROCARDUM elaborata, excusa est Parisiis anno MDXLIV. Non est temerè confundendus is scriptor, cum antiquiore illo *Burchardo*, quem & *Brocardum* multi solent vocare.

GUILIELMUS POSTELLUS, anno MDLII. Syriæ descriptionem, seu Chorographiam Terræ Sanctæ, emisit, cum aliis Geographicis.

Exstat Jerosolymitanæ urbis totiusque Terræ Sanctæ Tabula TILMANNI STELLÆ, Sigenensis, quam anno MDLVII. Antverpiæ excudi curavit.

Jerusalem civitas ex Sacris Litteris & adprobatis Historicis primùm ab ADAMO REISNERO, Germanicâ Linguâ, delineata & Latine per JOANNEM HEIDENUM fusiùs descripta, lucem vidit Francofurti ad Mœnum, anno MDLXIII.

Anno MDLXXII. BENEDICTUS ARIAS MONTANUS, Hispalensis, vir eruditissimus, edidit Antiquitatum Judaicarum Libros novem; quorum primus inscribitur; *Phaleg, sive de Gentium sedibus primis*; secundus, *Chaleb, sive de Terræ Promissæ partitione*; tertius, *Chanaan, sive de duodecim Gentibus*; quartus, *Nebemias, sive de Antiquæ Jerusalem situ*; ceteri ad alia Sacra pertinent. Id opus est recusum ad calcem Tomi V. Interpretum Criticorum